



JUDICIAL **SYSTEM** MONITORING PROGRAMME
PROGRAMA MONITORIZASAUN BA **SISTEM** JUDISIÁRIU

Komunikadu Imprensa
19 Setembru 2024

Kuadru Partidu Polítiku Munisípiu Baukau husu ba lideransa nasionál sira atu halakon ódiu no vingansa hodi lori Timor ba futuru ida próspere

Iha loron 18 Setembru 2024, JSMP realiza atividade formasaun ba kuadru partidu polítiku sira ne'ebé iha asentu parlamentár hanesan CNRT, Fretilin, PD, PLP no KHUNTO iha Munisípiu Baukau.

Formasaun ne'e ho tema "Lideransa Transformativu" ne'ebé kobre asuntu relevante sira hanesan konseitu lideransa, lideransa tuir péritu sira, nosaun kona-ba líder, jestór, xefe ka patraun, inklui tipu ka modalidade lideransa, qualidade lideransa no lideransa ideál. Alende ne'e, JSMP apresenta mós matéria relevante balun kona-ba demokrasia, knaar órgaun soberanu sira nian no partisipasaun públika iha prosesu foti desizaun polítika no halo lei.

Formasaun ne'e realiza ho objetivu atu eleva no reforsa koñesimentu kuadru lideransa no estrutura partidu sira nian, ne'ebé énfaze ba qualidade lideransa ne'ebé inspira hosi esperiéncia no ezemplu ka referénsia ba prátika di'ak sira nasaun seluk hodi reflète ba ita nia kontestu atuál.

"JSMP konsiente katak, internalmente partidu ida-idak iha ona polítika formasaun ba nia kuadru no militante sira, maibé JSMP mós hanoin katak importante mós atu enkaixa perspetiva sosiedade sivil atu reforsa koñesimentu atuál, liuliu atu explora maneira oinsa atu interpreta no ezamina asuntu públiku hosi perspetiva kúmun ka perspetiva interese públiku", dehan **Sr. Casimiro dos Santos, Diretor Ezekutivu Interinu JSMP.**

Abertura ba formasaun ne'e prezide hosi Koordenadór "Gabinete de Apoio à Sociedade Civil (GASC)", **Sr. Eng. Joaquim da Costa Freitas.** Iha ninia intervensaun, Sr. Freitas, haktuir katak tema kona-ba "lideransa" nu'udar tema ida krusiál no rekere tempu adekuada atu bele absorve matéria relevante sira kona-ba saida mak lideransa ho ninia evolusaun sira. Maibé, nia apresia JSMP tanba bele hahú inisiativa ne'e, liuliu tanba identifika formasaun ne'e alvu partisipante sira hosi kuadru partidu polítiku sira.

Nia mós hatutan katak, forum sira hanesan ne'e importante tanba permite espasu ba partidu polítiku sira hodi iha kontaktu no komunikaun/relasaun ba malu, kritíka no avaliaun ba programa governu iha nivel munisipál.

Aleinde ne'e, nia afirma formasaun ne'e nia objetivu mak forma ema/lider partidu polítiku atu prepara-an sai lideransa di'ak iha futuru. Maske formasaun ne'e loron ida de'it ho partisipante ne'ebé limitadu, maibé pelumenus iha netik

oportunidade atu halibur malu hodi aprende nosaun ka konseitu jerál sira kona-ba saida mak lideransa ho ninia efetu sira. Tanba ne'e, rekomenda ba JSMP atu iha futuru atividade hanesan ne'e presiza fó tempu adekuada no aumenta númeru partisipante hodi permite ema barak aprende hamutuk no hanoin hamutuk ba futuru rai ida ne'e.

“JSMP antisipa ona katak atividade ne'e sei hetan entuziasmu maka'as hosi partisipante sira tanba JSMP fi'ar katak alende partisipa iha formasaun, partisipante sira ne'ebé mai hosi kuadru partidu polítiku sira sei aproveita espasu ne'e hodi espresa sira ninia preukupasaun, crítica, ezijénsia sira durante sesaun diskusaun no ida-ne'e produtivu tebetebes tanba promove diálogu aberta entre líder sira iha nível munisipál”, **reforsa Sr. Casimiro dos Santos, Diretor Ezekutivo Interinu JSMP.**

Partisipante sira apresia inisiativa ne'e, tanba bele lori kuadru partidu sira iha asentu parlamentár eleva sira ninia koñesimentu no absorve tan informasaun adisionál ba sira desenvolvimentu pesoál, no iha tempu hanesan fornese espasu ba sira atu iha interasaun no diálogu iha âmbito ida aberta, konstrutivu no komunikativu, maske iha diverjénsia política, sira iha oportunidade atu apresenta sira ninia preukupasaun, lamentasaun no crítica hodi kontribui ba desenvolvimentu iha nivel munisípiu.

Iha preukupasaun, crítica no lamentasaun oioin durante sesaun diskusaun. Hahú hosi atuasaun ba vendedór sira iha Dili, problema aimoruk iha ospital, problema edukasaun no demisaun ba profesór kontratadu sira ajustamentu ka re-estruturasaun ba kargu ne'ebé nakonu ho nepostizmu/familiarismu, to'o projeitu adjudikasaun direita ho naran emerjénsia.

Entre preukupasaun sira ne'e hotu, asuntu ne'ebé sai sentru ba diskusaun mak ódiu, vingansa no arogánsia política entre lider sira ne'ebé sei lori efeitu sériu ba ezisténsia Timor iha futuru. Tanba ne'e, partisipante sira husu ba lideransa nível nasional atu hamutuk hodi husik tiha ódiu, vingansa no arogánsia política hodi hatuur aas interese nasional no transforma Timor ba futuru ida prósperu liu. Partisipante sira mós ate rekomenda katak di'ak liu, formasaun hanesan ne'e presiza introdus ba lideransa nasional sira tanba problema boot liu mak iha nivel nasional, la'ós iha nivel lokal ka munisipál.

Partisipante sira ne'ebé partisipa iha formasaun ne'e hamutuk nain 21, ne'ebé kompostu hosi mane 13 no feto hamutuk ema na'in 8.

Casimiro dos Santos
Diretór Ezekutivo Interinu JSMP
Diresaun e-mail: casimiro@jsmp.tl
Telefone: (+670) 33238883 |
Website: <https://jsmp.tl>
info@jsmp.tl